

# Ingebuorren yn it Grouster leechlân biwenne troch Jolle Nauta

1768 nû. 43 Douairière Van Kamstra geboren Van Haersma eignerske fan't hoarnleger (1 stim en 40 pounsmiet). Pyter Alberts silger eigner fan 40 pounsmiet, Pyter Alberchts erven brûker (papist). Nû. 46 Douairière Van Kamstra eignerske, Ane Sytse brûker.



Fan ôf de Jelle Wiggele's wei sjocht men healwei Grou en Watten in mânse stjelp stean. Men kin der komme lâns itselde sintelpaed dat ek nei Tjesmawier giet en dan jildt ek hir wer itselde as by de oare leechlânse pleatsen, foaral foar minskens dy't hir foar 50—60 jier werom ek wol ris west hawwe. Hwat in foroaring.

Doe in âlde huzinge mei in foarkeamer, in oanboude molkenkelder, in mulhûs, in bûthûs mei hege stâllen en in dûbele rigele, alles âld en nou in mânse stjelp, alles rom en geef. Mei foar op de list fan de dakgoate skildere „Ingebuorren”.

Doe't ik dêr om my hinne seach kamen de bernejierren wer boppe en tocht ik hoe't wy yn 'e aeisikerstiid fan Jolle Nauta, de pake fan de tsjintwurdige Jolle Nauta tastimming kriegen om ien moarn yn it lege lân fan syn pleats to aei sykjen, mits wy de aeyen dy't bij de koaijen leine lizze lieten.

By dizze pleats wie in stik droech makke mar der't yn dy tiid noch al in drok fûgel libben wie en der't hiel

hwat ljippen har nêsten hiene.

Jolle Nauta moast neffens it hierkontrakt „ljipaeijen aan 'e lânhearde leverje en dy socht hij safolle mooglik yn eigen pleats.

Nou wennet der wer in Jolle Nauta, in noch jonge boer. Hy wie net thús doe't ik kaem en sadwaende hie ik aerdich tiid ris om my hinne to sjen om fan it forline wêr yn it hjoed to kommen.

Doe't wy oan it praten rekken kaem der ek noch in âlde foto fan de pleats op 'e lappen, spitich dat dy net skerp genôch is om opnommen to wurden. De pleats is nou eigen aan de famylje Van Limburg Stierum en earder Van De Blocq van Scheltinga.

„Engeburen”, nou „Ingebuorren” naemd komt yn 'e floreenkohieren foar under nû. 43 en droech ien stim.

Eigeners en brûkers hawwe west: 1640 Burgm. Taco Sapes Annema eigener.

1698 Pyter Pyters tot Leeuwarden eigener,

1708 as yn 1698 „INGEBUORREN“

1718—1738 Pytter Abes, eigener en brûker.

1748—1768 Vrouwe Douairiere van Kamstra en Pytter Abes erven eigner, Thomas Anna brûker.

1778 as yn 1768.

1788—1798 Thomas Anna erven.

1818 Thomas Anna erven en A. Y. Faber.

1828 Goslik Lykler eigener en brûker

1838—1858 Geertje Gosliks Lykla eigener, Sybren Rintjes Uilkema eigener.

Oant safier de floreenkahieren. Letter hat der in famylje Kooistra wenne. Yn 1895 kamen der nije biwenners, Jolle Nauta en Elske Bylsma, earder boer yn Earnewâld. Se hawwe der oant 1918 ta wenne. Doe bin-

ne Doaitze Nauta en Janke Jaarsma der kommen en yn 1949 de tsjintwurdige biwenners Jolle Nauta en Froukje Jellema.

Sa buorkje de Nauta's hjir nou al wer 70 jier. De pleats is 86 poumsmiet en der wurde 35 melke kij hâlden.

Ik tink dat it eigendom ek langer as 70 jier famylje Van Limburg Stierem — de Blocq van Scheltinga west hat.

Yn de tiid fan Jolle en Elske wie de forhâlding tusken eigener en brûker prachtich. Dan kaem „mynhear“ altyd ien dei yn it jier op'e pleats. En it barde in kear dat Jolle Nauta in brief nei de lânhearre werom stjûrde mei de oantekening „onleesbaar“. Hy krige trije dagen letter in skriuwen werom der't ûnder stie „Heeft mij drie minuten gekost“.

d. H.